



SIDAAMU DAGOOMU QOQQOWI MOOTIMMA AFFINI GAAZEEXA

የሲዳማ ብሔራዊ ክልላዊ መንግሥት አፍኒ ጋዜጣ

SIDAAMA NATIONAL REGIONAL STATE AFFINI GAZETA

1^{ki} Diro Kiir ...

Hawaasa, Woxawaajje 6, 2012 M.D

Sidaamu Dagoomu Qoqqowi Mootimma
Amaalete Mini Allaalshi Hundanni Fulinoho

በሲዳማ ብሔራዊ ክልላዊ መንግሥት ምክር
ቤት ጠባቂነት የወጣ

ጆኛ ዓመት ቁጥር ...

ሀዋሳ ነሐሴ ፮ ቀን ፳፻፲፪ ዓ.ም

Amado

Wodhote Kiir 3/2012

Sidaamu Dagoomu Qoqqowi Mootimma Massagaanote Damoozanna Addi Addi Horaamishshu
Baatooshshe Murate Fultino Wodho Qoola

WODHOTE KIIRO 3/2012

Sidaamu Dagoomu Qoqqowi Mootimma Massagaanote Damoozanna Addi Addi Horaamishshu
Baatooshshe Murate Fultino Wodho

Sidaamu Dagoomu Qoqqowi Mootimma giddo addi addi jeefisiisaano mootimmaate uurrinshara massagaanchimatenni gaamante loossanno mannu wolqara daganna mootimma uyitinoonsa yawo kakkaoshshunninna jawaantetenni jeefisiissanno gede irko assanno baatooshshunna jawaachishshu amanyooti heera noosita ammanatenni;

Mootimmannita womaashshu, mannunna udiinichu jiro massaganno mannu wolqa afidhanno baatooshshenna addi addi horo annimanna xa'mamooshshe mereerisino garinni seerunni mura hasiisanno daafira;

Qoqqowu jeefisiisaanote amaale mini Sidaamu Dagoomu Qoqqowi Mootimma Bayiriidi Seeri quwa 57(6) garinni tenne wodho fushshino.

Mittu Waagi
ያንዱ ዋጋ

AFFINI GAAZEEXI P.S.K
አፍኒ ጋዜጣ ፖ.ሣ.ቁ.
Web address: www.affinigazet.gov.et

GAFA MITE

Xaphooma Woro

1. Harancho Su'ma

Tenne wodho “**Sidaamu Dagoomu Qoqqowi Mootimma Massagaanote Damoozanna Addi Addi Horaamishshu Baatooshshe Murate Fultino Wodho Kiirro 3/2012**” yine woshshinara dandiinanni.

2. Tiro

Qaalu horo wole tiro aanno gede assa hoogguro tenne wodho giddo:

1. “**Massagaancho**” yaa qoqqowu mereershinni kayse woradu geeshsha afantanno jeefisiisaano uurrinshubba giddo massagaanchimmatenni loosanno gede mootoonsinoonni kalaqamu manchoti.
2. “**Damooza**” yaa jeefisiisaano mootimma uurrinsha giddo massagaanchimmate deerra kaima assatenni rosamino loosira aganunni mitte hinge womaashshunni uynanni baatooshsheti.
3. “**Addi addi horaamishshu baatooshshe**” yaa jeefisiisaano mootimma uurrinsha giddo massagaanchimmate deerra woy loosu dana kaima assatenni addi addi yannara womaashshunni woy udiinnichunni woy lamanka mitteenni amadino garinni uynanni baatooshshe woy owaante hanqafannoho.
4. “**Massagaanchimate deerra**” yaa bayriidi, aliidinna mereerima yine bandanni massagaanote deerraati.
5. “**Bayriidi Massagaano**” yaa qoqqowu presidaanticha, laynkki qoqqowu pirezidaanticha, laynkki qoqqowu pirezidaantichi deerinni mootoonsinoonni massagaanoti.
6. “**Albisa massagaano**” yaa qoqqowu jeefisiisaanote amaale mini miila ikkitino uurrinshsha sooreeyye, qaru odiitere, Hawaasi quchumi qaru kantiibi, zoonete tantano qaru gashshaanchinna birote sooreeyye deerrinni mootoonsinoonni massagaano hanqafanno gaamoosheeti.
7. “**Aliidi massagaano**” yaa qoqqowu jeefisiisaanote amaale mini miila ikkitino uurrinshsha laynki sooreeyye, komishiinere, laynki qara odiitere, qara dayrekitere, qaru loosu ha’risaanchi, qoqqowu deerri borrote mini soorreessi, Hawaasi quchumi laynki kantiibi, zoonete tantano laynki gashshaanchinna laynki birote sooreeyye deerrinni mootoonsinonni jeefisiisaano uurrinsha massagaano hanqafanno gaamoosheeti.

8. **“Mereerima massagaano”** yaa laynki komishiinere, laynki dayrekitere, laynki loosu ha’rusaancho, Hawaasi quchumi gashshootu amaale mini miila ikkitino biddishshubba sooreeyye, Sinu quchumi qaru gashshaanchi, woradu qaru gashshaanchi, woradu deerri quchumu gashshooti kantiibi, qoqqowu mereershi uurrinshubba giddo heedhannonna mootonsate amanyootinni gaamantanno dayrekitoreetete dayrekitere, zoonete tantano kilasterete massagaanonna kunni aleenni xawinsoonni deerubanni gaamantino massagaano hanqafanno gaamosheeti.
9. **“Qoqqowu”** yaa Sidaamu Dagoomu Qoqqowoti.

3. Koo-teemmate Xawishsha

Tenne wodho giddo mitte koo-teemmanni xawinsoonni hedo wole koo-teemmanno amadannote.

4. Jeefishshu Mami-geeshsha

1. Tini wodho qoqqowu mereershinni kayse woradu geeshsha afantanno jeefisiisaano uurrinshara shoolu massagaanchimmate deerrinni mootonsinoonni massagaanora baantanni damoozanna addi addi horaamishshu baatooshshe lainohunni loosu aana hossanno.
2. Kunni quwi cinaanchu quwi 1 aana worroonnihi noo gedeenni heereennanni addi seerinni galtanno jeefisiisaano uurrinshubba giddo gaamantanno massagaano damoozanna addi addi horaamishshu baatooshshe lainohunni addi wodho fultara dandiitanno.

GAFA LAME

Damoozanna Barru Hoshsho Lainohunni

5. Damooza

1. Qoqqowu mereershinni kayse woradu geeshsha noo massagaano damooza lainohunni wodiidi daga, dagoominna manni qoqqowinni fulitino damoozu Iskeele qoqqowohono loosu iima hossanno.
2. Mootimmaweelo uurrinshanni woy aliidi rosu woy xiinxallote uurrinshanni mootimmate loosira mootoonsinonni massagaanchira:
 - a) Qoqqowu mereershi, Hawaasi quchumu mereershira, zoonete tantanora, woradu mereershira woy woradu deerri quchumira mootimmate uurrinshara mootoonsinonniha ikkiro albi

uurinshanni afiranni noo damooza baantasira dandiinanni.

- b) Kunni cinaanchu quwi fidale (a) iima xawinsonni garinni baantanni damoozi qoqqowu mereershira 25,000 (lemiina ontu kumi), Hawaasi quchumu mereershiranna zoonete tantanora 15,000 (tonaa ontu kumi) hatono woradu mereershira 13,000 (tonaa sasu kumi) aleenni ikka dinosi.

6. Barru Hoshshonna Daallasu Fulo Lainohunni

1. Gobbate giddo heedhanno loosu hajora barru hoshshonna daallasu fulu lainohunni federaaletenna qoqqowu mootimma massagannora 2005 M.D fulino barru hoshsho jeefishshu biddissi garinni loosu iima hosanno.
2. Kunni quwi cinaanchu quwi 1 iima worroonnihi noo gedeenni hereennanni pirezidaantichu daallasu fulu kio nookkita ikkitanna pirezidaantichu gobbanni noo bayriidi massagaanonna albisa massagaano daallasu fulu mittu hashshira 3,000 (sasuu kume) birri geeshsha galte shiqishanno darasanyinni mootimmatenni baantanniha ikkanno.
3. Aliidi massagaano daallasu fulu mittu hashshira 2,000 (lamu kume) birri geeshsha galte shiqishanno darasanyinni mootimatenni baantanniha ikkanno.
4. Bayriidi, albisanna aliidi massagaano oofaanonna hirsisaano sagaleta fulu damoozinsa bikkinni uynanni barru hoshsho ikkita daallasa lainohunni massagaano galtannowa galte shiqishanno darasanyinni mootimmatenni baantaninsa ikkanno.
5. Gobbate gobbanni heedhanno loosu hajora hadhanno massagaanora baantanni barru hoshsho lainohunni ministirootu amaale mini fushshino biddissi garinni ikkanno.
6. Kunni quwi cinaanchu quwi 2-4 geeshsha worroonni garinni baantanni daallasu baatooshshira barru hoshsho aaninni 40% dimurranni.
7. Kunni quwi cinaanchu quwi 2-4 geeshsha worroonnihi noo gedeenni hee'reennanni mootimma fulu bikkunni assatenna massagaanote hobbatera Addis Ababu quchumira wosinu mine qixxeessinara dandiinanni.

GAFA SASE**Addi Addi Horaamishshu Baatooshshe****7. Gallanni Mine**

1. Qoqqowu bayriidi massagaanora insanna maatensa keeraanchimma agarate injaanohu gallanni mini mootimma widoonni qixxaawanno.
2. Kunni quwi cinaanchu quwi 1 garinni qixaawino minira hasiisanno mini uduunni, gatamarshu loosi, pirotokoolet, koyishshunna w.k.l. hajubba mootimma fulonni loosamanno. Tenne hajo laino tittirishu biddissa faynaaniseete biironna pirezidaantichu borro mini halamatenni fushshitara dandiitanno.
3. Kunni quwi cinaanchu quwi 2 aana worroonnihi noo gedeenni heereennanni qoqqowu pirezidaantichi galanno mootimma hoowe giddo addi addi garinni daanno wosina koysate hasiisanno basenna udiinnichi mootimma fulonni wonshinanniha ikkanno.
4. kunni quwi cinaanchu quwi 1-3 geeshsha worroonni garinni bayriidi massagaano galtanno mine mootimma widoonni qixxeessate dandiinannikkiri heeriro:
 - a) Qoqqowu pirezidaantichira kio nookki garinni gallanni mine mootimma fulonni karaaya'nara dandiinanni.
 - b) Qoqqowu pirezidaantichi gobanni noo bayriidi massaganora aganunni 20,000 (lemuu kumi) geeshsha kafalanni mine mootimma fulonni karaaya'nara dandiinanni.
 - c) Kunni cinaanchu quwi fidale (b) iima worroonnihi noo gedeenni heerennanni bayriidi massagaano uminsanni kara'ya hasidhuro aganunni 15,000 (tonaa onte kume) birra damoozu ledó baantanninsaha ikkanno.
5. Albisa massagaanora wolqa fajjitu bikkinni galatanno mini mootimmatenni qixxaawannoha ikkanno.
6. Kunni quwi cinaanchu quwi 5 garinni gallanni mine mootimma widoonni qixxeessate dandiinannikkiri heeriro aganunni 10,000 (tonne kume) birra minu kiraye daafira baantanninsaha ikkanno.
7. Aliidi massagaanora wolqa fajjitu bikkinni galtanno mini mootimmatenni qixxaawannoha ikkanno.
8. Kunni quwi cinaanchu quwi 7 garinni gallanni mine mootimma widoonni qixxeessate

dandiinannikkiri heeriro aganunni 8,000 (sette kume) birra minu kiraye daafira baantanninsaha ikkanno.

9. Mereerima massagaanora gallanni mine mootimma widoonni qixxeessate dandiinannikkiri heeriro aganunni 6,000 (lee kume) birra minu kiraye daafira baantanninsaha ikkanno.
10. Woradu layinki gashshaanchira gallanni mine mootimma widoonni qixxeessate dandiinannikkiri hee'riro aganunni 3,000 (sase kume) birra minu kiraye daafira baantanninsaha ikkanno.
11. Woradu gashshootu borro mini sooreessira, woradu woy woradu deerri quchumira borrote mini sooreyyenna hakko deerrinni mootoonsinoonni massagaanora aganunni 2,000 (lame kume) birra minu kiraye daafira baantanninsaha ikkanno.
12. Kunni quwi cinaanchu quwi 4-11 geeshsha worroonni horaamishshu baatosshsi eote giwire dimuranniho.
13. Federaalete mootimmani qoqqowu mootimma albisa woy aliidi massagaanchimma mootonsineenna dagganno massagaano yannate geeshsha maatensa Addis Ababaho galtanno minu kira gaamantino qoqqowu uurrinsha widonni baantanniha ikkanno. Tittirshu faynaansete biironni fulanno biddissinni xawinsanniha ikkanno.

8. Hodhishsha

1. Qoqqowu pirezidaantichira lame shoollunku gommi motore noosi (four wheel drive) kaameelinna maatesira mitto otomobile kaameela gaamanniha ikkanno.
2. Kunni quwi cinaanchu quwi 1 iima worroonnihi noo gedeenni heerennanni adawu agarooshshira hasiise leelliro wole kaamella ledotenni gaammara dandiinanni.
3. Laynki pirezidaantichiranna laynki prezidaantichi deerrinni mootoonsinoonni massagaanora mitto shoollunku gommi motore noosi (four wheel drive) kaameelanna maatesira mitte automobile kaameela gaamanniha ikkanno.
4. Albisanna aliidi massagaanora loosoho hasiisannonna hojjinsanni horonsidhanno mitto kaameela gaammanninsaha ikkanno.
5. Kunni quwi cinaanchu quwi 4 aana worroonnihi noo gedeenni hereennanni albisanna aliidi massagaanora quchumu giddo hodhishshira horote iima hossanno kaameella gaammara dandiinanni. Tittirshu faynaansete biiro fushshitanno biddissinni xawinsanniha ikkanno.
6. Mereerima massagaanora quchumu gidonna fildete loosira hasiisanno mitto kaameela gaamanniha ikkanno.

9. Bilbilanna Interneete

1. Bayriidi massagaanora gallanni mini bilbilinna horote gedensaanni baantanni moobaylete bilbili horora hasiissanno fulo mootimmatenni baantanniha ikkanno.
2. Bayriidi massagaanora gallanni mini Interneetera aganunni 1,000 (mittu kumi) birri geeshsha mootimma fulonni baantanniha ikkanno.
3. Albisa massagaanora horote gedensaanni baantanni moobaylete bilbili horora hasiissanno fulo mootimmatenni baantanniha ikkanno.
4. Kunni quwi cinaanchu quwi 3 hunda worroonnihi hee'rirono gobbate gobbaanni bilbilatenni dagganno fulo mootimma dibaattanno.
5. Albisa massagaanora gallanni mini Interneete horora aganunni 800 (settu xibbi) birri geeshsha mootimma fulonni baantanniha ikkanno.
6. Aliidi massagaanora horote albaanni baantanni woy horote gedensaanni baantanni moobaylete bilbili horora aganunni 1,000 (mittu kumi) birri geeshsha mootimmatenni baantanniha ikkanno.
7. Aliidi massagaanora gallanni mini Interneetete horora aganunni 600 (lewu xibbi) birri geeshsha mootimma fulonni baantanniha ikkanno.
8. Mereerima massagaanora horote albaanni baantanni moobaylete bilbili horora aganunni 500 (ontu xibbi) birri geeshsha mootimmatenni baantanniha ikkanno.
9. Mereerima massagaanora gallanni mini Interneetete horora aganunni 300(sasu xibbi) birri geeshsha mootimma fulonni baantanniha ikkanno.
10. Woradu qaru gashshaanchinna woradu deerri quchumu kantiibi horote albaanni baantanni moobaylete bilbili horora aganunni 500 (onte xibbe) birra mootimmatenni baantanniha ikkanno.
11. Woradu laynki gashshaanchinna woradu deerri quchumu laynki kantiibi horote albaanni baantanni moobaylete bilbili horora aganunni 400 (shoole xibbe) birra mootimmatenni baantanniha ikkanno.
12. Woradu gashshootu amaale mini miillanna woradu deerri quchumi gashshootu amaale mini miillara horote albaanni baantanni moobaylete bilbili horora aganunni 300 (sase xibbe) birra mootimmatenni baantanniha ikkanno.
13. Woradu laynki borrote mini sooreyye nna woradu deerri quchumi laynki borrote mini sooreyyera horote albaanni baantanni moobaylete bilbili horora aganunni 250 (lame xibenna ontaa) birra mootimmatenni baantanniha ikkanno.

10. Sidiemme woy Ividio

1. Bayriidi massagaano loosu hajora interneete nookki base hadhanno woyte interneetete horo uytannonna deerrase agadhitino sidiemme woy Ividio udiinnichonna sim kaarde hiratenni interneete horonsidhu bikkini mootimma fulonni baantanniha ikkanno.
2. Albisa, aliidinna mereerima massagaanora loosu hajora interneete nookki base hadhanno woyte interneetete horo uytannonna waagise 1,500 (mitto kumenna onte xibbe) birra sainokki sidiemme woy Ividio udiinnichonna sim kaarde hiratenni interneetete horora aganunni 300 (sase xibbe) birra sainokki kaarde mootimma fulonni wonshinanninsa.
3. Kunni quwi cinaanchu quwi 1-2 geeshsha xawinsonni garinni sim kaarde balaashsha'uro itiyo telekomira xawisatenni bididi assinanniha ikke umi yannara hironni sidiemme woy Ividio udiinnichi bairo, mooramiro woy w.k.l. korkaatinni hoogiro laynkimeeshsho hirrara dandiinanni.
4. Kunni quwi cinaanchu quwi 3 iima worroonni garinni wirro hirate xa'mo shiqqara dandiitannohu umikki yannara hirrinkunni mittu diri gedensaanni ikka noose.

11. Lapitoppenna Moobaylete Qafo

1. Pirezidaantichaho hojjinni loosanno loosira hasiissannonna qollannikki mitte yannilicho lapitoppe woy taabilete hattono mitte yannilicho moobaylete qafo waaginsa kiamikkinni mootimma fulonni hirre uynannisaha ikkanno.
2. Pirezidaantichu gobbanni noo bayriidi massagaanoranna albisa massagaanora hojjinni loosanno loosira hasiissannonna qollannikki mitte yannilicho lapitoppe woy taabilete waagise 30,000 (sajjoo kume) hattono mitte yannilicho moobaylete qafo waagise 20,000 (lemoo kume) sa'anokkita mootimma fulonni hirre uynanninsaha ikkanno.
3. Aliidi massagaanora loosu hajora horonnsidhanonna qollannikki mitte yannilicho moobaylete qafo waagise 15,000 (tonaa onte kume) sa'anokkita mootimma fulonni hirre uynanninsaha ikkanno.
4. Kunni quwi cinaanchu quwi 2 – 3 geeshsha worroonni garinni hirre uynoonni lapitoppe woy taabilete ontu diri worroonni hattono moobaylete qafo lamu diri worroonni disoorrinanni woy layinkimmeeshsho dihirranni.

12. Fayyimmate Owaante

1. Bayriidi massagaano ministirootaho fajjinoonni fayyimmate owaante afidhanoha ikkanno.
2. Bayriidi massagaano galtenna dirinsa 18 woroonni ikkitino oosonsara deerrase agadhitino gobba giddo fayyimmate owaante mootimma fulonni afidhanno.
3. Albisa massagaano minister deetootaho fajjinoonni fayyimmate owaante afidhanoha ikkanno.
4. Aliidinna mereerima massagaano, hattono galtensanna dirinsa 18 woroonni ikkitino oosonsa deerrasi agadhitino gobba giddo mootimma fayyimmate uurrinshara fayyimmate owaante mootimma fulonni afidhanno.
5. Woradu massagaanonna woradu deerri quchumu massagaano, galtensanna dirinsa 18 woroonni ikkitino oosonsa dirunni 4,000 (shoole kume) geeshsha fayyimmate owaante mootimma fayyimmate uurrinshara mootimma fulonni afidhanno.
6. Kunni quwi cinaanchu quwi 4 nna 5 iima xawinsonni garinni mootimma fayyimmate uurrinshara owaante hoogatenni rifere assiniro hojji fayyimmate uurrinshara owaante afi'ranoha ikkanno.
7. Aliidinna mereerima massagaano heedhanno qarqari gobbanni fayyimmate owaantera wolewa hara hasiisannota ikkase fayyimmate dokiteri xawishshinna qoqqowu pirezidaantichi fajjiro massagaanchu fayyimmate uurrinsha heedhannowa haratenna higate yannara barru hoshsho baantannisaha ikkanno.
8. Kunni quwi cinaanchu quwi 6 iima xawinsonni barru hoshsho baatooshshi massagaanchu goxe aka'manno yanna dihanqafanno.

GAFA SHOOLE

Fajjonna Loosu Iima Iillitanno Gawajjo

13. Fajjo Lainohunni

1. Xissote Fajjo
 - a) Xissote kainohunni loosu iima leellate dandaannokki massagaanchi xissote fajjo afi'ranno.
 - b) Kunni cinaanchu quwi fidale A garinni uynanni xissote fajjo sufotenni ikko sae sae adhatenni uynara dandiinannihu xisso hanaffu umi barrinni hanafe heedhanno 12 aganna giddo settu agani aleenni ikkitara didandiitanno.

- c) Kunni cinaanchu quwi fidale B garinni uynanni xissote fajjo lee agannara wo'mu damoozinninna gattino lame agannara bocu damoozi ledo uynannisaha ikkanno.
 - d) Xissamino massagaanchi basera mootimma wole mootoonsate hasidhuro mootimma uurrinsha giddo massagaanchu ikkadimma heedhanosi basera gaamamannoha ikke horonna baatooshshu mootimma loosaasine lallawi garinni jeefishsha afiranno.
2. Ilate Fajjo
Godowinni noo massagaanchu mootimma loosaasine lallawi garinni ilate fajjo afidhanno.
 3. Wi'late Fajjo
Massagaanchu wi'la heedhunsro sasu sufote barrira fajjo uynannisi.
 4. Fonqolu Fajjo
Massagaanchoho fonqolu heerisiro rosanno uurrinshanni abbanno taje garinni fonqolu noosi barrubbara fajjo afiranno.
 5. Adhammete Fajjo
Massagaanchu adhammete amanyooti heerisiro sasu loosu barrira fajjo afi'ranno.
 6. Addi Fajjo
Massagaanchu yoote mininni woy biilloonyu noo bissanni shiqqino woshshattora woy doorshu hajora mootimma loosaasine lallawi garinni addi fajjo afi'ranno.

14. Loosu iima iillitanno Gawajjo

1. Loosu iima iillitanno gawajjo lainohunni mootimma loosaasine xuratu lallawi kiirro 714/2003 quwa 28 iima uynonni tiro massagaano lainohunni jeefishshu noote.
2. Kunni quwi cinaanchu quwi 1 iima xawinsonni tiro massagaanchu uurrinshatenni xawinse uynoonni qorophishsha ayirrisa hoogatenni woy bisosinna buqqeesi hajaja dandaannokki agatto woy janguluulisanore woy dimbisannore adhe loosu iima leellatenni iillitino gawajjo loosu iima iillitino gawajjo gedde dikiirranni.
3. Loosu iima gawajjo iillitinosi massagaanchira hasiissanno fulu mootimmatenni baatantanno.
4. Loosu iima gawajjo iillitinosi massagaanchi xagisi're hura geeshsha woy gawajjo hurtannokkita ikkase fayyimmata tajenni xawinsa geeshsha xissote fajjo wo'mu damoozi ledo afi'ranno. Konni garinni uynanni xissote fajjo 12 agani aleenni diikkitanno.
5. Kunni quwi cinaanchu quwi 4 aana xawinsonni garinni 12 agani giddo hure loosu higate dandiinnokki massagaanchi mootimma loosaasine xuratu lallawi garinni xuratanna kiisote

baatooshshe afi'rannoha ikkanno.

6. Massagaanchu iima illitino gawajjo sayikki bisinni iillitinota ikkituro mootimmaate uurrinsha massagaanchoho fushitino fulora kiiso gawajjo iillishino sayikki bisinni xa'midhara dandiitanno.
7. Massagaanchu gawajjote kiiso gawajjo iillishinosi sayikki bisinni adhinoha ikkiro mootimmaate uurrinsha massagaanchu gawajjo daafira fushitino fulo massagaanchu damoozinni murtanni adha dandiitanno.

15. Reyote Korinni Soqqansho Uurrituro Uynanni Baatooshshi

Xuratu seerinni murroonni horo noo gedeenni heedheennanni massagaanchu reyotenni tenne alamenni baaxxenna soqqanshosi uurrituro lubbotenni noonna mootimmaate uurrinshara borrotenni engensiisino galtesira woy hundasinni galtanno maatesira sasu agani damooza baantanni.

GAFA ONTE

Rosu Kaayyo Lainohunni

16. Gobbate Giddo Rosu Kaayyo

1. Qoqqowu mereershinni woradu geeshsha heedhanno massagaano loosinsanninna akatoommensanni albisa ikkitino hattono seeda yannara dagate ammanamatenni soqqantino massagaano mootimmaate gashshootu taqqubbanni hasiissanno garinni fille rosu kaayyo uynanninsa.
2. Kunni quwi cinaanchu quwi 1 iima xawinsoonni bikkishsha lainohunni massagate gumaammimara 40% hattono massagaanchimmaate soqqansho yannara 30% qoqqowu deerrinni jeefisiisaanote amaale mininninna qoqqowu worroonni heedhanno mootimmaate taqqubbara gashshootu amaale minna widoonni keenne uynanniha ikkana xaphoomu maassote gumira (CGPA) 30% amande massagaanote mereero assinanni heewonni roorino guma abbinohu rosu kaayyo horaameessa ikkanno.
3. Kunni quwi cinaanchu quwi 2 iima xawinsonni heewishshu keenora meytenna bisu xe'ne noonsa massagaanora irkishshu qaafora 8 nna 5 bixxille aantete garinni ledotenni amandanninsaha ikkanno.
4. Kunni quwi cinaanchu quwi 2 iima worronnihu heerirono rosu kaayyora heewisamanno massagaanchi ajay ajeena lamu dirinna hakkunni alenni ikkitanno yannara massagaanchimmatenni

mootoo'me loosinoha ikka noosi.

5. Massagaannoniti rosu kaayyo loosu iima hossannohu qoqqowu mootimma uytanno gumulonninna wortanno faashsho galiinniti.

17. Gobbate Giddo Rosu Kaayyo Afidhino Massagaanora Uynanni Baatooshshi

1. Tenne wodho quwa 16 garinni heewisante rosu kaayyo afidhanno massagaanora massaggu uurrinsha widoonni massagote deerri damooza baantanninsaha ikkanno.
2. Rosoho hasiisannonsa fulo mootimmatenni baatanntanota ikkita xiinxallote hajora hasiissanno fulo biddissunni murranita ikkitanno.
3. Damoozu gobbaanni fajjinanni horo lainohunni biddissunni murranita ikkitanno.

18. Gobbate Gobbaydi Rosu Kaayyo

Mootimma widoonni dagganno gobbate gobbaydi rosu kaayyo lainohunni tenne wodho quwa 16 iima xawinsoonni garinni assinanni heewo noo gedeenni heedheennanni gobbate gobbaydi rosu kaayyo uytino uurrinsha xa'mitanno hajo guuta hasiissanno.

19. Gobbate Gobbaydi Rosu Kaayyo Afidhino Massagaanora Uynanni Baatooshshi

1. Tenne wodho quwa 18 iima worroonnihu gobbate gobbaydi rosu kaayyo afi'rino massagaanchirano loosu iima hosano.
2. Kunni quwi cinaanchu quwi 1 iima worroonnihu noo gedeenni heerennanni rosu kaayyo afirino massagaanchi haranno gobbara heedhanosi fulora kaa'litanno 1,000 (mittu kume) doolaare mitte hinge calla massaganni keeshshi uurrinsha widoonni baantannisiha ikkanno.

20. Roso Gudde Higganno Massagaano Gaama Lainohunni

1. Tenne wodho quwa 16 nna 18 iima worroonni garinni rosu kaayyo horonsidhe rosse higganno massagaano roso gudansa loossanni heedhe hadhu mootimma uurrinshara roso guddunkunni mittu agani gidde borrotanni egensiisa noonsa.
2. Roso gude higinno massagaanchi addi addi mootimma taqqira gaammame soqqamatenna loosate gadadi noosi.
3. Rosu kaayyo horonsire higinno massagaanchi aante noo rosu kaayyora heewisamate albaanni

maassote gedensaanni ajanni ajeenna rosino yanna geeshsha loosa noosi.

GAFA LEE

Massagaanchimmatenni Ka'anna Ka'ate Guma

21. Massagaanchimmatenni Ka''a Lainohunni

1. Aye massagaanchino aye korkaatinni soqqanshosi uurrituto woy agurate xa'miro loosanni keeshshino loosu dana, soqqanshosi yanna, baantannisi damoozanna massagaanchimmatenni kaino korkaata xawissanno soqqanshote xawishshi taje uynannisi.
2. Massagaanchimmatenni kainonna addi addi korkaatinni wolewa gaamaminokki manchi sas agani geeshsha massagaanchimmatenni baantannisi keeshshini damoozinna addi addi horaamishshu baatooshshi albiidi uurrinsha widoonni baantanisiha ikkanno.
3. Massagaanchimmatenni kaino manchi tenne wodho quwa 22 garinni mootimmaate loosaa sincho ikke gaammama hoolanosiri noota massagaanchimmatenni kaysinosi bisi borrote xawishsha lamu agani giddo shiqisha hoogiro ikkadimmasinna rosi deerra kaima assinonna addi addi mootimmaate taqqira heedhanno mootimmaate loosaa sinchima madabera gaammannisiha ikkanno.
4. Kunni quwi cinaanchu quwi 3 iima worroonni garinni:
 - a) Qoqqowu mereershi uurrinsha massagaanchimanni kainohura qoqqowu mereershi heedhano uurrinshubbara rosi sinna rosi chisi deerri fajanno jawa ogimmaate madabera gaammamanno.
 - b) Hawaasi quchumu mereershi woy zoonete tantanora heedhanno uurrinsha massagaanchimanni kainohura Hawaasi quchumu mereershi woy zoonete tantanora heedhano uurrinshubbara rosi sinna rosi chisi deerri fajanno jawa ogimmaate madabera gaammamanno.
 - c) Woradu mereershi uurrinsha massagaanchimanni kainohura woradu deerrinni heedhano uurrinshubbara rosi sinna rosi chisi deerri fajanno jawa ogimmaate madabera gaammamanno.
 - d) Kunni cinaanchu quwi fidale A – C geeshsha worroonnihi noo gedeenni hee' rennanni massagaanchimmatenni kaino manchi rosi deerranna rosi chisi ikkadimma agartino madabera qoqqowu giddo gaammannisiha ikkanno.
5. Massagaanchimmatenni kainonna wolewa gaammannisi gede xawishsha uynoonni

massagaanchira wolqate aleenni ikkino korkaatinni wolewa mootonsinikkiinni woy ogimmate gaamooshshe uynikinni keeshshanoha ikkiro sas aganinni sa'annokki yannara albiidi uurrinsha widoonni damoozasinna addi addi horaamishshu baatooshshe afi'rannoha ikkanno.

6. Kunni quwi cinaanchu quwi 4 iima worroonnihu noo gedeenni heereennanni massagaanchimmatenni kainonna aanteteno qoqqowu deerrinninna hakkunni aleenni ikkino deerrira gaammamanota hajo la'anno bisinni xawinsoonni massagaanchira horaamishshu baatooshshi addintanni kaameelunna gallanni mini hajo pirezidaantichu borro mini widoonni gumulo afidhanota ikkitanno.
7. Massagaanchimmatenni gaammamara albaanni mootimmate loosaasincho ikkinokkinna rosu mininni fule dhaaddotenni massagaanchimmatenni gaammaminohunna hattono amaalet mini miila ikke keeshshinohu massagaanchimmatenni ka''anno woy amaalet mini miillima yanna gudino manchi daggitte owaantenna mannu jiro latishshi biiro widoonni kaajjitino mootimmate loosaasinchimma madabera hasiissanno amanyoote wonshe gaammamannoha ikkanno.

22. Mootimmate Loosaasinchimmani Gaammama Hoolanno Korkaata

1. Dhuku anje ikkinokkinna afanni heere loos baddalatenni gaamooshshunni kainohura;
2. Muishshu jaddo loosatenni kisse shiqqinosihura;
3. Umesi yannanni massagaanchimmate loos agurinohura mootimma gaamooshshe aate gadadi diheeranose.

GAFA LAMALA

Addi Addi Woro

23. Addi Seerinni Galtanno Uurrinshubba Lainohunni

1. Tenne wodho quwa 4(2) iima worroonnihu noo gedeenni hee'reennanni addi seerinni galtanno uurrinshubba massagaano damoozanna addi addi horaamishshu baatooshshe lainohunni Wodiidi Daga, Dagoominna Manni Qoqqowinni fultino gumulo addi seerinni galtanno qoqqowu uurrinshubba massagaanora loosu iima hossanna.
2. Kunni quwi cinaanchu quwi 1 iima worroonnihu noo gedenni hee'reenanni tenne wodho quwa 7, 10 nna 11 iima worroonnihu addi seerinni galtanno uurrinsha massagaanora loosu iima hosanno.

24. Loosu Dani Kaiminni Bilbilu Baatooshshe Uynanni Loosaasine

1. Bayriidi massagaano ofaano, hirisiisaanonna qara borreesaanora horote albaanni baantanni moobaylete bilbili horora aganunni 200 (lamu xibbi) birri geeshsha mootimmatenni baantanninsaha ikkanno.
2. Albisa massagaano ofaanonna qara borreesaanora horote albaanni baantanni moobaylete bilbili horora aganunni 100 (mittu xibbi) birri geeshsha mootimmatenni baantaninsaha ikkanno.
3. Kunni quwi cinaanchu quwi 1 nna 2 deerrinni loossanno loosaasine loosa dandiitanokki woytenna lamu agani aleenni ikkitino yannara riqiwotenni gaamante loosanno loosaasinera bilbilu baatooshshe uynanninsaha ikke riqiwooshshu ka''anno woyite baatooshshuno uurrannoha ikkanno.

25. Xuratu Kiirro Afidhinokki Massagaano

Xuratu kiirro heedhunsakkinninna qixirete amanyoote wonshitukkinni xuratu baatooshshe baatanni keeshitino massagaano mootimma loosaasine gashshooti lallawinninna xuratu lallawi garinni biddi assinnaninsaha ikkanno.

26. Baajete Amada Lainohunni

Tenne wodho garinni massagaanote uynanni addi addi horaamishshu baatooshshiranna hasiissanno baajete massagaano gaamantino uurrinshubba widoonni amadantenna kaajjite loosu iima hossanota ikkitanno.

27. Gatamarsha Woy Bilishshite Lainohunni

1. Tenne wodho garinni massagaanote uynoonni udiinnichi horote kaiminni dagganno gatamarshunna bilishitete hajo hasiisaanchimma kaima assatenni mootimma fulonni mitte hinga calla loosiinsansara dandiinanni.
2. Kunni quwi cinaanchu quwi 1 garinni gatamarsha woy bilishshite iillase horonsiranni noo massagaanchi yannatenni xawisa noosi.

28. Xa'mamooshshe

Tenne wodhora worroonnihu gobbaanni damooza, barru hoshsho, addi addi horaamishshu baatooshshenna w.k.l baatanohu woy baatisiisiranohu hunaanichimmasi garinni gashshootunna seeru

qaafo hajo la'anonsa bissanni adhinannisiha ikkanno.

29. Biddissa Fushsha

Tenne wodho jeefisiisate hasiisanno biddissa qoqqowu faynaansete biiro fushshitannoha ikkanno.

30. Jeefishshu Nookki Seerinna Assooti

Tenne wodhonni hanqafantino hajo lainohunni tenne wodho ledi kipi yaanno seeri woy rosamino assooti jeefishshu dinosi.

31. Wodho Loosu Iima Hossanno Yanna

Tini Wodho Maaja 01/2012 M.D hanaffe loosu iima hossanno.

Hawaasa, Woxawaajje 6, 2012 M.D

Desta Ledamo

Sidaamu Dagoomu Qoqqowi Mootimma Pirezidaanticha